



Inatsisartuni ilaasortaq Sofía Geisler  
Inuit Ataqaatigiit  
/Maani

## Silap pissusia nukissiuuteqarnerlu pillugit § 37 naapertorlugu apeqquteqaammut nr. 132-2020-mut akissut

Asasara Sofía Geisler

Inatsisartut suleriaasianni § 37 naapertorlugu silap pissusia nukissiuuteqarnerlu  
pillugit Naalakkersuisunut apeqquteqaateqarputit.  
Apeqqutitit uannit akisassanngorlugit innersuunneqarput.

Allakkat ulluat: 18-08-2020  
Suliap normua: 2020 - 13199  
Allagaatip ilisarnaataa: 14539070

Postboks 1614  
3900 Nuuk  
Oqarasuaat: (+299) 34 50 00  
Fax: (+299) 34 54 10  
E-mail: pan@nanoq.gl  
www.naalakkersuisut.gl

1. **2008-2015-imut Nukissiuuteqarnikkut iliuusissatigut suliassatigullu  
pilarsaarutaasimavoq 2012-imi allartisarneqassasoq.**
  - a. **Iliuusissatigut suliassatigullu pilarsaarutaareersut  
piviusunngortissallugit Naalakkersuisut iliuuseqarsimappat?**
  - b. **Malitseqartinneqarneranut sulinertik Naalakkersuisut sumut  
killippaat?**

Nunanut Allanut Nukissiuuteqarnermullu Naalakkersuisoqarfik imaattumik  
ilisimatitsissuteqarpoq:

*"Aap, Naalakkersuisunit 2008-2015-imut Nukissiuuteqarnikkut iliuusissatigut  
suliassatigullu Pilarsaarut ingerlappaat.*

*Tamatuma kingorna nukissiuuteqarnikkut iliuusissatigut suliassatigullu pilarsaarut  
Naalakkersuisut Nukissiuutini Imermillu Pilarsuinermi Pilarsaarutaannik,  
2030-p tungaanut pimoorullugit anguniakkanik arlalinnik imaqartumik  
taarserneqarpoq.*

*2007-imi iliuusissat ilusilerneqarmatali, assersuutigalugu Kalaallit Nunaanni  
erngup nukinganik innaallagissiorfinnit nukissiaq ataavortoq annertusitillugu  
2008-mi Narsami aamma Qaqortumi, 2010-mi Sisimiuni aammalu 2013-imi  
Ilulissani pilarsuisoqalerpoq. Ullumikkut illoqarfiit arfinillit erngup nukinganik  
innaallagissiorfinnit tallimaasunit pilarsorneqarput, taamaalillunilu pisortat  
nukissiamik pilarsuinerisa 70%-iisa missaat nukissiuutinit ataavartunit  
pissarsiarineqartarput.*

2. **Immikkoortumut UPA19/51-imut atatillugu pilarsinneqartup  
suleqatigiissitap sulinini sumut killippaa?**
  - a. **Suleqatigiissitap innersuussusiani qaqugu  
saqqummiutissallugit pilarsaarutigivaa?**

Coronap tuniluunnerata kingunerisaanik Naalakkersuisut karsimik misissuineramik taasamik ingerlataqarput, ilaatigullu Aningaasaqarnermut Akileraartarnermullu Ataatsimiititaliap akuersissuteqarnerata kingunerisaanik aningaasaliissutit arlallit allannngortinneqarput annertussutsimikkulluunniit ikilisinneqarlutik. Tamanna tunngavigalugu avataaniit immikkut ittumik ilisimasalinnik oqalliffiup pilersinneqarnissaanut aningaasaliissutit peerneqarput.

### **3. Nuna tamaat isigalugu sila pillugu anguniakkat Naalakkersuisut aalajangersaaffigivaat?**

Naalakkersuisut 2030-mi ajornartitsiviunngitsuni nukissiuutinik mingutsitsinngitsunik angusaqarnissamut anguniagassanik aalajangersaasimapput. Naalakkersuisut silap pissusianut tunngatillugu inissisimaffiat 30. aprili 2019-imi tamanut ammasumik saqqummiunneqarpoq, una tunngavigineqarluni:  
[https://naalakkersuisut.gl/da/Naalakkersuisut/Nyheder/2019/04/3004\\_klimaomraadet](https://naalakkersuisut.gl/da/Naalakkersuisut/Nyheder/2019/04/3004_klimaomraadet). Tassani Naalakkersuisut nunarsuarimi silap pissusianut suliniuteqarnermi tapersiissutissaat suunersut allasimapput.

### **4. Suliat suut aallarnerneqarsimappat, Silaannarmik mingutsisisut gassit aniatinneqarnerisa millisarneqarnissaannut annikillisarneqarnissaat siunertaralugu qanoq iliuuseqartoqarpa?** **a. Suliniutit piviusunngortinneqarnerat qanoq kinguneqassanersut qanorlu aningaasartuutaassanersut misissuiffigineqarsimava?**

Apeqqut 3-mut akissut takuuk.

### **5. Nukissiuutit pillugit siunnersortit pilersinneqarnissaannut piffissaq iliussissallu pillugit imalimmik pilersaarusiortoqarsimava?**

Nukissiorfiit ilisimatitsipput, tuniniaanermi niuernermilu ineriartortitsinermi suleqatigiinnik peqarlutik, taakkulu ilaatigut illoqarfanni erngup nukinganik innaallagissiorfeqarfiusuni aaqqiissutissanik mingutsitsinngitsunik, soorlu uuliamik atuilluni kiassarnermut taarsiullugu innaallagissamik kiassarnermik qaminneqarsinnaasumik atuilernissamik suliffeqarfinnut namminersortunut pisortanillu pigineqartunut siunnersuisarnermik suliaqartassapput.

Aamma Nukissiorfinnit ilisimatitsissutigineqarpoq, attaveqaqateqarnermi suliniutinik, innuttaasuni nammineerluni inoqutigiinnut sammitinneqartunik ingerlatsisoqartoq, tassanilu illunik piginnittut qanoq iliorlutik kissamik pilersuinermi innaallagissamik kiassarnermut qaminneqarsinnaasumut attaviliisinaanersut siunnersorneqarsinnaapput ilitersorneqarsinnaallutillu. Suliniut taanna pingaartumik Ilulissani atuuppoq, kisiannili Nukissiorfinnit ilisimatitsissutigineqarpoq, 2020-p ingerlanerani suliniutip illoqarfinnut allanut siaruarterneqarnissaa naatsorsuutigineqartoq.


**6. Sila pillugu iluaqutaasussat anguniarneranni ileqqut allangortinnissaannut aningaasatigut pitsaaqutissatut isigineqartussat eqqarsaatigalugit akileraartarnikkut akitsuutitigullu allannguinerit suut Naalakkersuisut pilersaarutigaa?**

Nukissiornermi ikummatissat avatangiisinut akitsuutaat pillugu Inatsisartut inatsisaat nr. 21, 18. november 2010-meersoq aqputigalugu mineraluulia atorlugu tunisassiat, aamarsuit gassillu, Kalaallit Nunaanni kissaliornermut innaallagissiornermullu atorneqartut kiisalu motoorinut ikummatissat avatangiisinut akitsuuserneqartarnissaat akuersissutigineqarpoq.

Avatangiisinut akitsuutinut inatsit ilaatigut mingutsitsinermut, ilaatigut uuliamik benziinamillu atuilluni kissaliornermit innaallagissiornermillu, aammalu motoorinut ikummatissanit pisunut akitsuusiinissaq alloriarfigineqarpoq. Akitsuusiinermi pissusilersornermik, silap pissusianut mingutsitsinnginnerulluni atuinissamut allannguniarnissamut, taamaalillunilu kalaallit CO2-nik aniatitsinerinik annikinnerulersitsinissamut kajuminnerulersitsinissaq siunertarineqarpoq.

Nukissiornermut tunisassianut avatangiisinut akitsuutit Avatangiisinut Aningaasaateqarfimmut nakkartinneqartarput. Avatangiisinut Aningaasaateqarfimmit aningaasat avatangiisini sulianut tunniunneqartarput. Ukiuni tulluuttuni avatangiisinut akitsuutinik utertitsisarnermilu aaqqissuussinernik amerlanerusunik, aningaasanik aningaasaateqarfimmut tutsitsiviusussanik atuutsitsisoqalersinnaavoq. Avatangiisinut akitsuutinik allanik atuutsitsisoqalissapat, taakku avatangiisinut akitsuutit pillugit Inatsisartut inatsisaanni immikkut ittuni akuersissutigineqartassapput.

Inussiarnersumik inuulluaqqusillunga



Jess Svane

# INUIT ATAQATIGIIT

## Inatsisartuni



7. august 2020

Inatsisartut Suleriaasianni § 37 imm. 1 naapertorlugu Naalackersuisunut apeqquq imaattoq matumuuna saqqummiuppara.

### **Naalackersuisunut apeqquq:**

- 1. 2008-2015-imut Nukissiuuteqarnikkut iliuusissatigut suliassatigullu pilersaarutaasimavoq 2012-imi allartisarneqassasoq.**
  - a. Iliuusissatigut suliassatigullu pilersaarutaareersut piviusunnngortissallugit Naalackersuisut iliuuseqarsimappat?**
  - b. Malitseqartinneqarneranut sulinertik Naalackersuisut sumut killippaat?**
- 2. Immikkoortumut UPA19/51-imut atatillugu pilersinneqartup suleqatigiissitap sulinini sumut killippaa?**
  - a. Suleqatigiissitap innersuussusiani qaqugu saqqummiutissallugit pilersaarutigivaa?**
- 3. Nuna tamaat isigalugu sila pillugu anguniakkat Naalackersuisut aalajangersaaffigivaat?**
- 4. Suliat suut aallarnerneqarsimappat, Silaannarmik mingutsisisut gassit aniatinneqarnerisa millisarneqarnissaannut annikillisarneqarnissaat siunertaralugu qanoq iliuuseqartoqarpa?**
  - a. Suliniutit piviusunnngortinneqarnerat qanoq kinguneqassanersut qanorlu aningaasartuutaassanersut misissuiffigineqarsimava?**
- 5. Nukissiuutit pillugit siunnersortit pilersinneqarnissaannut piffissaq iliuusissallu pillugit imalimmik pilersarusiortoqarsimava?**
- 6. Sila pillugu iluaqutaasussat anguniarneranni ileqqut allannngortinnissaannut aningaasatigut pitsaaqutissatut isigineqartussat eqqarsaatigalugit akileraartarnikkut akitsuutitigullu allannguinerit suut Naalackersuisut pilersaarutigaat?**

(Inatsisartuni ilaasortaq Sofia Geisler, Inuit Ataqatigiit)

### **Tungavilersuut:**

Iliuusissatigut suliassatigullu pilersaarutip 2007-meersup nalunaarusiallu 2009-meersup suliarineqareerneranni suliassat assigiinngitsut aallarnisarneqarsimasut ilimagilluinnarpara. Naalackersuisoqatigiit siunertaat isumaqatigilluinnarpakka, tassalu silap allanngoriartornera ima

sukkatigisiumik pimmat aatsaat taama pingaaruteqartigilersoq sutigut tamatigut pilersaaruserluarnissaq. Tassami silap allanngoriartupiloorneratigut sunnerneqarput inooriaaserput, ileqqugut, inuussutissarsitigut, illuliortitsineq sanaartornerlu, kiisalu angallanneq.

Taamaattumik qilanaarivara paasissallugu aallartisarneqareersimasut ataqatigiissarnerat Naalakkersuisunit qanoq suliarineqarnersoq, aammalu sila pillugu naleqqussarnermut tunngatillugu siunertanik tigussaasunik qanoq ittunik Naalakkersuisut suliaqarnerut.

Kissaatigivara apeqqutikka ullut suliffiusut qulit qaangiutinnginneranni akineqarnissaat.